

# Балгъсан модар кеерүлий

Джил ирвас мана балгъсдин, селәдин бәәдлинъ сәәхрәд йовна. Ик сарул гермүдиг кәк хамтхаста моддуд хаврин эклцәс ави намрин сүл күртл эврә сүүдрән өгч, күүнә бәәдлджиргълит кеерүлдж, нүдиг байрлулна. Мана республикин хотл балгъси хойр джил өмн бәәси бәәдлинъ ода цагинлә дунъцүлхлә, темдгтә кевәр бәәдлән сольдж. Сад тәрлгнә сар октябрин 20-с ави ноябр сарин 20-н күртл болхми. Ямаран кәдлмш сад тәрлгнә сарин өдрәс ави эндр өдр күртл кегдв гисн сурврт? — балгъсна благоустройствин конторин агроном үр Грищенко Мария Гавриловна иигдж келв:

«Балгъсна күцәгч комитет сад тәрлгнә сард балгъснд 25 минъгън мод тәрхми гидж тогтавр авцхала.

Эн кәдлмш күцәхин төлә, балгъсна организац болгънд, учрежденьс болгънд даалгъвр өгәтә. Зәрм организацс эврә даалгъвран цугъарагъинъ күцәцхәнә. Улгүрлхд, статистическ управленә, радиовещәнә комитетин, «Сельэлектро» гидг организацс нүк малтлгъна зурагъан күцәв. Болв, «1-е Мая» гидг артель ода чигн нүк малтлгъна кәдлмшиг экләд уга, даалгъвран болхла — 500 нүк малтх зөвтә. Мана конторин бригадт 30 күн бәәцхәнә. Бидн өдртән минъгън мод тәрх зөвтәвди, болв, эн кәдлмш күцәгддж бәәхш. Гофицк лесопитомник болн Благодарненск гослесопитомник маднд мод хулдси уга, ягъад гихлә, хулдг модн уга чигн. Тегәд бидн Аршаняс мод оч малтдж авчанавди. Мана кәдлмшт АТК цаглань өрүгъяр

маши өглго чигн харшлад бәәнә.

Эн джил эклдѣ Горная, Изотова болн нань чигн модд тәргдхми. Аршаняс бидн 500 гар мод малтдж авчклавди. ода тедниг тәрхәр белддж бәәнәвди. Мана өмнмдн одачн йир ик кәдлмш бәәнә. Эн кәдлмшән күцәхин төлә, дуту-дундсит уга кех кергтә.

Благоустройствин конторин начальник үр А. Э. Мозгунов эврәннъ кәдлмшчнрүрн ирхш, күүндвр кехш. Кәдлмшчнрт цаглань мөнъгън өггдхш. Цааранднъ үр А. Э. Мозгунов иим кевәр кәдлмшан кехлә, ноябрин 20 күртл даалгъвран күцәдж чадшго.

Балгъсна общественность, мод тәрлгнә төрт шунмгъа кевәр орад, эврә балгъсан сәәхрүлхми.

С. ЖУКОВ.